



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 7

Kiralongrar Tahawwur Rana
India tonga anir aruogo: NIA

Bangladesh court-i Sheikh Hasina
aputsü totuyuba tasen agütsü



VOL. XXII ISSUE NO. 177 (ADOK 177)

DIMAPUR

ROGONÜ FRIDAY)

RONGCHII (APRIL) 11, 2025

₹ 5.00

Nisung tepsetbaken o nung SC-i bail agütsü

Dimapur, Rongchii/April 10 (TYO): Nagaland Assembly elections agitsü anogo ishika lia February 22, 2023 nü Imkongjiba Kichu tasü mang ngutetba dak sendakba nung tai tonglokja alir nisung asem nung Supreme Court of India-i bail agütsüogo.

Mokokchung nung ken o ka benokba dak sendakba nung appellants Chepdakmayang, Lipoktemsü aser Temsuakum nung ya küm ana dak tema tepuokdak yua liasü. Iba ken o nungya Indian Penal Code indang Sections 120B, 341, 365 aser 302 kübok tasa tamajung yangluba, senzüsempingba nokdangba, pua bener aoba aser tepsetba densema lir.

Justice MM Sundresh aser Justice Rajesh Bindal na alia bench yagi bail agütsütsü mulunga obendang agütsü aser ken o jembishinü tawa ang tenzük aser tenük kuli alir aika anung masadangi lir ta ashi.

"Iba tatalokba ken o asadanga aser iba den mapang talangka tepuokdak ayuba ajanga appellants nem bail agütsütsü junger ta angateter," ta court ajanga taoba hopta totuyuba agütsüba nung shia lir. Par asem ya trial court ajanga lateta yutsüba terms nung ajemdaker chioktsü.

Linük nung tulutiba court telemtetba ya ajanga Gauhati High Court (Kohima Bench) ajanga May 8, 2024 nü totuyuba agütsüba agientsür, kong parnok indang bail application magizük. Iba mapang Justice Budi Habung-i ken o kanga majungba yong aser parnok chioktsü asoshi kuli tasen maiba yong parnok bail nung chioktsü memelar ta shia liasü.

May 2024 application ya Chepdakmayang asoshi bail plea tasembuba liasü aser Lipoktemsü aser Temsuakum asoshi tanabuba liasü, aser Supreme Court dangi mabendang item bail plea kata court-i magizük.

ANCSU-i DGP dang Reny Wilfred ken o bushisüngdangtsü akhanger

Dimapur, Rongchii/April 10 (TYO): Investment Development Authority of Nagaland (IDAN) nung Joint Secretary, Reny Wilfred, IAS ajanga mapa inyakdak tesem nung mapa inyaker tetsür dak tim masüba mapa inyakba indang ken o tekeraba nung bushisüngdangtsü akhanger, ta All Nagaland College Students' Union (ANCSU) ajanga Director General of Police, Nagaland Police Headquarters, Government of Nagaland dangi tezüluba ka agütsüogo.

Reny Wilfred ya 2020-2021 küm Noklak indang Deputy Commissioner inyakdanga tetsürchanu ana dak tim masüba mapa inyakba atema ken o benoka lir, anungji Wilfred ya aiben ozüing alema tetsür dak tim masüba mapa inyakba nisung ka lir ta tejangja sayur.

Yamaji pai mapa tamajung inyakaka pa indang ken o mebentetba ya tebilemtsü tulu lir. Iba ama menügdakba yimya ya tangatetba lokti asoshi timtem lir aser tetsür aser tanur kumzüka aser akumtsüboa amshiba yimya anemba lir, ta ANCSU shiti nung shia lir.

Anungji tali memonui iba ken o tulu tasü ita bushisüngdanga Indian Penal Code (IPC) nung aliba ama aibelener nem tapet temerenshi agütsütsü ajungshir.

Onok repranga atar kisüing ama malitsü saka timtem ajurur alir nem ochi obendang magütsü tashi onok jeret-pereta aser saksalema meita atatsü.

Nü tashi amshia iba ken o tekeratiba nung benteta menügdakba nung kaketshir den mangatettet madoktsü onoki nü dak tamang akar, ta ANCSU ajangasa ashi.

Medzhiphema sub-division kübok ali kibur dang metetdaksür

Dimapur, Rongchii/April 10 (TYO): Chümoukedima district nung Medzhiphema sub-division kübok Nagaki Incubation City centre amenoktsü asoshi agitsü atema ali asar aliba kibur ajunga dang land compensation agütsütsü atema documentation inyaktüsü, ta Deputy Commissioner, Chümoukedima, Polan John, NCS ajanga metetdaksüogo.

Medzhiphema (Molvom) atema April 14-17, 2025 aser New Socunoma Village atema April 21-25, 2025 anogotem alitsü.

Tekalen shia aliba yimtsüing nung ali kibur ajungai passport tasazük noksa pezü, Bank account tejangja (bank passbook front page photocopy), Identity proof (Aadhaar card/DL/EPIC etc), Landownership papers tem Land Revenue Branch, Office of the Deputy Commissioner, Chümoukedima nem office mapang agütsütsüla.

Ruzaphema village kübok land compensation agütsütsü anogo aser osang mapangtong nung metetdaksütsü, ta sangdong ajanga ashi.

Memunudang BEFR 1873 yanglushir amshitsüla: NSF



Kohima, Rongchii/April 10 (TYO): Naga Students' Federation-i par Inner Line Regulation Commission (ILRC) ajanga lisopur Naga nung socio-economic aser yimtenren tesendaktep nung tebilemtsü tali akumba mechi Inner Line Pass (ILP) ya mapa kuma shidak amshia aotsü ayongzük.

Brehostibarnü NSF office nungi osangbener den jembidang, northeastern states kar nung lisopur temeden wazüka ayutsü atema non-local tem aita aziükba akhi tejen BEFR nung temelenshi nüngdakba indang state Chief Secretary J. Alam nem tezüluba ka agütsüogo, ta NSF tir Medovi Rhi aser ILRC chairman aser kaketshir lenir NSN Lotha nati metetdaksü.

Tejangja tenüing tetshia aliba district telungzük nung "Inner Line" ta ajaba line mapang shia melenshitsu state sorkar nem tashi agütsüba BEFR 1873 nung shia lir, aser iba kübok lisopur masürtem nem chief executive officer mesüra tashi agüja aliba district ketdangsür-i pass magütsü iba line majangtsü tenokdangba agüja lir, ta ashi.

Naga nung merasürtemi rongsenketzüng tsütsü ampangyimba mereprangi yutsüba yong timtem adoktsü

anameta nung lir, aser Naga nung rongsenketzüng amokbangba ya kanga ulua kuma general elections mapang item nisungtemi yimten yimsüsür nem senotsü teyari agütsür, ta NSF-i ashi.

Nagaland-i India senso ajunga pelashishia jaoker, saka ainer temi state ozüing sülen anidaktsüla aser region nung lisopur temeden nung timtem magütsütsüla, ta ashi.

Nagaland nung tang aliba BEFR ya zübazüyima amshir aser iba yongji ozüing alema bendanger tali aita Naga nung ayak, ali aser takum alitsü asoshi tebilemtsü tulu agütsür, koba Mizoram nungbo kanga junga amshir, ta ashi.

NSF ILRC ajanga state nung ILP shidak mapa kuma inyaktüsü asoshi tongtipang tebilembatem lemsatepogo aser itemji, Nagaland telungi aita bendanger ajunga tsüngsü aputsü atema Centralised ILP Database amenoktsü, Assam den arütsü aser Dimapur Railway Station aser Airport nung ILP Checkpoints tashi itshitsü, ILP nung aibelener meita oa mera agitsü atema district shia ILP Enforcement Wing temeja amenoktsü, BEFR ozüing junga angateta amshitsu asoshi sorkar ketdangsür nem sensitisation training agütsütsü dena lir.

ILP agütsüdang taa bendenba

aser amshiba indang osang tejangja yimjak nung sangdongtsüla, cash transactions ajemtsü aser tali ochishia inyaktüsü mechi ILP Fees atema UPI aser accounts tejangja ajanga digital payment yimya amshitsüla.

ILP agütsüba mapang Aadhaar mesüra EPIC amshitsüla aser guarantor teinyaktüsü shidak agütsütsüla aser kuli tejangja alirtem nem dang ILP ya agütsütsüla, ta NSF ajanga ashi.

Aibelener dang senchi achiba ya tajemba agi sen 5,000 aser tanen makai aibelener dang sen 25,000 tashi achitsüla, ILP renewal ya timba agi anaben tashi atsülangtsü aser iba sülen kechi südir süaka state nungi ainshitsüla.

Nüburtem tarutsü jenjang alangzüka ayutsü asoshi Government of Nagaland-i mera tejangja aser tajung agitsü mapang tongogo aser tang metokmeperi alibatam memotongshira yakta Naga nung ya pei tasoli nung nütsüing tajemba akumtsü, ta NSF ILRC ajanga tsüboa bilemba lemsatep.

BEFR tekeratiba nung mapa kuma amshia nüburtemi tamang katettsü sorkar dak tashi lir aser Naga nung tejangraba aser taginüba ya tematiba asütsüla, ta NSF ajanga ashi.

Mapa tamajung inyaktüsü metsü ner classroom nung prok: DRYO

Dimapur, Rongchii/April 10 (TYO): Ozü adianu Class 10 nung azünger Athonio Magh dak February 20, 2025 nü züka merenshiba tejashi lemsaa iba shiti ya zülur, ta Fr. T.P James dangi Dimapur Rengma Youth Organisation (DRYO) tenüing nung advisor Aga Rengma-i shiti ka zülua liasü.

Iba tatalokba ajanga tanubosang ya mozüki nung takum kumzüksü asoshi ICU nung munga lir. Iba tatalokba yagi kaketshirtem kati ka merenshiba mereprang yutsüba aser school ketdangsüri temulung magütsüba sayur, ta ashi.

Nai April 4, 2025 nü shiti züluba social media nung züngshio, kong iba tatalokba temai adokba sülen school-i mera agiba indang lemsatepa liasü, saka nenoki mera agiba ya kanga tezüdangtsü aser agizüksü makokba mapa lir, kechiaser iba tebilemtsü nungi school management pila alitsü meranga timtem ya school telungzük nung atalokba masü aser 'third party' osang ataa lir ta ashi.

Iba azüdokshi mapa tamajung inyaktüsü metsü ya ner jara telungzük, ner tesayur aser staff temi repranga lia Don Bosco Hr. Sec. School indang classrooms nung prok, ta DRYO ketdangsür ajanga ashi.

Athonio Magh ya pa indang tiffin mechi mesüshia aser merenshia amshi, koba school telungzük nung tanen makai atalokba yimya ka mesüka lir. Iba ya ner classrooms telung nung, school lapoka aliba mapang atalok, kong pa mezüingmeshiba nem kokdaksütsü memulungba mechi amokmeren. Aser aji asangsang kuma school indang gates temalen inyaka yur ner rejui khuret mabentsü teka memetsütsüla, ta ashi.

School ketdangsüri mapang shidak nung süoki ia school telungzük nung külem kaketshirtem mesüshia aser merenshiba khuret aben asübo, kaketshir yimya meita ata asübo iba ama mapa tamajung nungi kumzüka lila. Pa kumzüksüba system-i mangu achia yutsüba mechi tanü tanur ka takum

agitsüsa yirur ICU nung anepaluba mapang lir, tav DRYO ajanga ashi.

Iba ama ataloktsüsa tensa tia bener arutsüba atema tekeratiba nung tenük ahi ajitettsüsa mera agitsü akhanger. School compound kumzüka ayutsüba kisüing masü saka taochi maliba yimya madokdaksütsüla, ta ashi.

"Trigger" ya school telung nungi atema yur school campus alema tokor ta jembitsü madoker. Iba shiti ya nüburtemi ochi obendang asoshi aser reju temelenshi asoshi nüburtemi ayongzüker ama südakjang. Timtem ajurur alisang aser par kibong dang tatok memshitsüji yutsür, aibelener nem tekeratiba nung tapet temerenshi agütsütsüla, aser anti-bullying, anti-ragging ozüing tesashi amshitsüla aser tarutsü nung yamai mataloktsü mechi counselling services-a agütsütsüla aser maparen nung kisüing masü saka tanüla aser mulungsentüsü nunga temelenshi adokdaksür südaktsütsü imlar, ta DRYO shiti nungsa shia liasü.

Kohima nung CSF vaccination tanabuba round tenzükogo



State Piggery Breeding Farm, Lerie, Kohima nung Round - II Classical Swine Fever amenokba sentong nung Additional Director & HoD, AH & Veterinary Services, Dr. B.M. Sunep-i ak ka dak vaccine agütsüba noksa nung angur.

Dimapur, Rongchii/April 10 (TYO): Livestock Health & Disease Control/Classical Swine Fever-Control Programme (LH & DC/CSF-CP) 2024-25 kübok Department of Animal Husbandry and Veterinary Services, Nagaland-i, Nagaland State Round - II CSF vaccination program State Piggery Breeding Farm, Lerie, Kohima nung India sorkar tetuyuba dak ajemdaker April 10 nü tenzükogo aser June 10 nü tembangtsü.

Iba vaccination drive ya CSF agi kongshitsü ana nung aliba ak 2,50,000 nem vaccine agütsütsü nükjidong nung tenzükogo. CSF ya ak dak kanga kara menatepa aoba tashidak ka aser iba ajanga rongsenketzung nunga takoksa tulu bener arutsü.

CSF prokshia aoba nokdangtsü atema iba sentong ya kanga tongtimbang lir, koba

ajanga Piggery industry aser ak metsürtem kanga akoksatsür.

Sentong nung o jembiba mapang Additional Director & HoD of AH&VS Dr. B.M. Sunep-i, vaccine agütsütsü aser CSF azüoktsü aser samatsütsü koda tongtimbang iba indang lemsatep.

Shiruru dak tashidak menatepa aoba nokdangtsü atema vaccine agütsüba ya tongtimbang inyakyim ka lir. Farm semdangertem azüokba, hadirtem disinfect asüba aser shirurtem health asadanga aliba amala bio security jenjang tesashi agiba den vaccine agütsüba ajanga tashidak menatepa aotsü ana nung aliba tajemba kümdaktsür.

Iba inyakyim ajanga pei farm dang kümzüka ayuba masü saka temeket nung alirtema kümzüka toktsür. Bio security inyakyim tapet benokba den vaccine

agütsüba ajanga Animal Husbandry sector menatepa aoba tashidak nungi jenboa litettsü.

Vaccine agütsüba sentong ya Livestock Health & Disease Control/Classical Swine Fever-Control Programme (LH & DC/CSF-CP), Department of Animal Husbandry, Dairying, and Fisheries, Government of India tawabangba kübok inyaksangshidar.

Vaccine ya angati agütsür aser ak metsürtem dang iba maongka ya agia district & field ketdangsürtem den teka amteper inyaka pei shiruru nem vaccine agüja parnok kümzüka ayutsü ayongzükogo.

Maneni Department-i, District Administration, Village Council ketdangsürtem dang yimdaklirtem aser farmer tem dang pei shiruru nem vaccine agütsütsü atema ajungshitsü mepeshia metetdaksüogo.

Naga People's Front-i asükhu lemsatep

Dimapur, Rongchii/April 10 (TYO): Ungma yimtsüng nungi Naga People's Front, Mokokchung Division Vice President tejentiba I. Kilang Jamir April 10 nü asüba osang angazüka mang ayimba Naga People's Front tir Apong Pongener-i sangdong ka ajanga lemsatepogo.

Kilang Jamir ya bendanga

agütsüba NPF züngsem ka liasü. Pai taküm tepeyong party indang nükjidong, tebilemba aser tamendakdak nungi masetshi-i aruogo.

Mokokchung Division nung NPF party pur terenlok atema pai kechi mapa tajungsa inyakteta toktsüogo, item ajak ya teti menungra bilemtettsü aser akümtsübuttsü.

Kü tenüng nung aser Naga People's Front tenüng nung ni asür kinungertem den asükhu lemsateper. Mangyim jashi mapang nung tulusang Tsüngremi parnok nem tashi aser ansüngzük agüjang ta sarasademtsür. Pa tanüla teti tatem makdak anisüngzükdakjang, ta tirisa kasa sangdong ajanga mettedaktsü.

Kiphire nung anti-rabies vaccination drive tenzük



Dimapur, Rongchii/April 09 (TYO): ADC & Administrator, Longdiba L Sangtam ajanga April 10, 2025 nü Veterinary Hospital, Kiphire nung azü tenüng zülüokba aser Anti-Rabies Vaccination drive tenzüksü.

Iba mapang Longdiba L Sangtam-i kidang metsüba azü ajunga tenüng zülüoka mapang shidak nung vaccine agitsü ayongzük aser taintem aser

nüburtem dang department den yaritepa facility ajunga agitsü ajungshia liasü.

Chief Animal Husbandry and Veterinary Services Officer Kiphire, Dr. Tsilise-i iba sentong nung jembidang, azü aser tanü mapang shidak nung vaccine agira noklang nung noklang shilem tashidak balala nungi kumzüksü ta ashi.

Anungji wards ajunga nung Free Anti - Rabies Vaccination

agitsü asoshi kiset shiruru ita asem nungi tema tenüng zülüoktsü ayongzük aser iba sentong ya azü nem vaccine agüja aser nüburtem nem awareness agüja 2030 tashinung azü dak nungi adokba human rabies samadaktsütsü asoshi ayongzük, ta ashi.

Iba sentong nung sorkar ketdangsür, NGOs aser nüburtem dena liasü.

Chumoukedima DPDB senden menogo

Dimapur, Rongchii/April 10 (TYO): Itashia agiba Chumoukedima Distict Planning & Development Board senden April 10 nü DC Office Chumoukedima nung Advisor & DPDB chairman, Chumoukedima, Zhaleo Rio lenisüba nung agiogo.

Senden ya züngsem tasentem metetpelaba sülen tenzük aser taoba DPDB senden minutes lepareprangshia liasü.

Senden nung mendenbubai, tzüngluruwa tenzük asünung iba dak sendakba jongdak maparen balala atema renema alitsü asoshi ken o dak sendaka aliba department tem ayongzüka liasü.

Paisa, agriculture department dang aluyimertem nem jenjang tajung metsüjangnatsütem agütsütsü aser scheme balala indang yimdaklirtem nem metetdaksütsü aser MLA tem nem parnok inyakyimtem metetdaksütsü mepeshia liasü.

Senden nungsa Advisor, Industries & Commerce, Hekani Jakhalu-i, department dang sentong tejangja ka yanglutsü mepeshi, kechiyong yim aikati scheme aser inyakyim indang mejangjai lir, ta ashi. Laisa, paroki nüburtem metenzüketra parnoki sorkar tenzük ka ama pei mapa nung tamakok angur, kechiyong parnok mapang tongtimbangtaji

nüburtem tenzüksüba lir, ta ashi. Tzüngluruwa atema renemshia atatsüba indang jembiba mapang lai, District Disaster Fund kübok lendong agi kongshir aliba kibongtem nem mapang shitak nung teyari agütsütsü atema lai ken o dak sendaka aliba department dang mepeshitsü ta tenangzükba agütsü.

House-isa, ken o balala benoka sensaksemogo, kong Jehovah Jireh School, Videma Village upgrade asütsüba; Chumoukedima District atema NST Service Station; Z. Rio Village agizüksüba; Lokheto Village agizüksüba; Medziphema jila nung Flatted Factory Complex amenoktsü atema ali agütsütsüba; Chumoukedima 'A' village nung GPS tentettsü benokba; Medziphema, HQ nung ACP posting densema lir. Kasa mapang nung yimtsüng tenüng Sirhi Angami nungi Medziphema 'A' Village-i melentsü atema benokba taruba senden nung sensaksemshitsü telemetba agia liasü.

Taruba DPDB senden nung DDMA-i monsoon preparedness dak sendakba nung power point presentations agütsütsü nongloktsü. Senden ya vice chairman, DPDB, Polan John-i tepela o jembir tembanga liasü.

Kohima nung kaketshirtemi temesepba mozü anema nokdaker

Dimapur, Rongchii/April 10 (TYO): Nasha Mukht Bharat Abhiyan kübok T.M Higher Secondary School, Kohima den longjemer the Kohima District Narcotics Coordination Committee (NCORD)-i sensitization sentong ka April 10 nü ayongzüka agiogo.

Sentong nung Kohima nung Nasha Mukht Bharat inyakyim Nodal Officer aser EAC (Development) Moasunep K. Jingru-i "taküm nung takok angutsü atema shitemang, shisatsü aser tanüla liromedemtsü nüngdaker," ta ashi.

Kaketshirtem aser staff tem den o jembiba mapang Moasunep-i, temesepba mozü amshiba ajanga, shitemang, tekelok shisatsü aser tanüla jenjang minpronger, koba taküm nung takok nguyonga aotsü atema kanga tongtimbang lir, ta ashi.

"Temesepba mozü yagi shitemang dang yirutsü masü saka iba yagi tebilemdangba mejangjai kümdaktsür aser shitak aser tai bendangteta iba dak ajemdaker jenjang agitsü atema asen tashi ajema kümdaktsür," ta pai ashi. Paisa, lanurtem dang yimayimpong azüoka aintsü, telemetba tajung agitsü aser tamendak dak akang akanga yangertsü ajungshia liasü.

Paisa, tanü asüng lima nung temesepba mozü dang masü saka phone nung mapang tali intokba aser social media tali amshiba amala addiction tem meita atatsü ajungshia liasü.

"Na tashi meiti kümdaktsüba

azüoktsü merangang. Nü tekelok ola agi masü saka shisatsü agi mesüang," ta pai ashi.

Sentong nungsa 13 Assam Rifles Medical Officer Capt. Dr. M. Vikas Kumar Reddy-i, temesepba mozü amshiba ajanga physiological aser psychological impact indang tangazükba agütsü. Paisa, stimulants, depressants, aser hallucinogens agi tekelok inyaksangshi nung kanga mejungi kongshir aser iba ajanga organ tem kanga mejungi raksatsür aser karbo taneptsü monguteti raksa tasüba dena ajangshir, ta ashi.

Paisa, osang tai angazükba, inyakdangnüa bilemba aser medemertemi nongshiba ajanga lanurtem aikati temesepba mozü amshir, ta ashi. "Vaping aser energy drinks koba kecha masü ama bilemer iba ya lendong tului aitsü asoshi tetenzük asütsü akok," ta pai tekümdangtsü metetdaksü.

Maneni pai kaketshirtem dang, "tetenzük, kechiyong toktsütsü melarabo masü," ta ashi.

Iba sentong nung kaketshirtem, tesayurtem, healthcare professional, sepaitem aser lokti nung stakeholders temi shilem agia liasü.

Sentong ya Vivozonuo Miachio-i sarasademertenzük aser school indang Vice Principal, Khriezoseituo Suohu lenisüba nung agi, shibai shisalen sayur aser sentong nung shilem agir ajak dang kanga pelaba lemsatepa liasü.

Kiralongrar Tahawwur Rana India tonga anir aruogo: NIA



April 10, 2025 nü New Delhi nung Tahawwur Hussain Rana yua aliba National Investigation Agency (NIA) headquarters kima sepaitem noksa nung angur.

New Delhi, Rongchii/April 10 (Agencies): Brihostibarnü National Investigation Agency (NIA)-i 2008 küm kiralongrartemi Mumbai amakba nung asalentong yanglur tongti, Tahawwur Hussain Rana Delhi tonga anir aruogo.

Pa India-i anir arutsü atema India-i küm aika inyaksangshia liasü.

India-US Extradition Treaty kübok Rana US nung judicial ket nung liasü. NIA aser Research & Analysis Wing senteper team kati pa tayimtsü ajanga anir aru.

2023 küm May 16 nü Central District of California District Court-i pa India-i yoktsü atema tetuyuba agüja liasü. Iba sülen Rana-i Ninth Circuit Court of Appeals nung temepishiba aika agütsü saka magizük. Iba sülen-

a pai US Supreme Court nem temepishiba aika agütsü saka magizük.

Tatema India-i US sorkar ket nungi 'surrender warrant' anguba sülen pa India-i anir arutsü atema India aser US na tsüngda inyakyim tenzüka liasü.

USDoJ, US Sky Marshal teyaritep ajanga NIA-i Indian intelligence agencies den amalietpa inyakba den külemi NSG, Ministry of External Affairs aser Ministry of Home Affairs-ia US nung tim ketdangsertem den tongtepratepa inyakba sülen tesüsa Rana India-i anir aruogo.

Rana-i David Coleman Headley @ Daood Gilani aser kiralongrar telok Lashkar-e-Taiba (LeT) aser Harkat-ul-Jihadi Islami (HUJI) na den Pakistan nung amenoka alir

kiralongrartem den asalentong yanglua 2008 küm Mumbai amak.

India sorkari Unlawful Activities (Prevention) Act, 1967 kübok LeT aser HUJI naprongla ya kiralongrar organisations, ta sangdongogo.

2008 küm November 26 nü kiralongrar 10-i Mumbai amakdang kiralongrar, Ajmal Amir Kasab dang taküm apu. Mumbai Police sub-inspector Tukaram Omble-i Kasab apuba atema pa nem Ashok Chakra award agütsü.

Sepaitemi kiralongrar 9 kaset aser Kasab bo taküm apuba sülen pa anema ken o angadanga aitsü aser 2012 küm November ita nung alenseta südaktsü.

Kiralongrartemi Mumbai amakdang nisung 166 asü aser nisung 238 yirua liasü.

Bihar nung district pezü nung tsüngi lendong nung nisung 13 asü

Patna, April 10 (Agencies): Bihar kübok district pezü - Begusarai, Darbhanga, Madhubani aser Samastipur nung tsüngi yaloktsüba lendong balala nung nisung 13 süogo, ta Chief Minister's Office (CMO) sangdong ajanga metetdaktsü.

Begusarai nung nisung pongu asü, Darbhanga nung nisung pezü, Madhubani nung asem aser Samastipur nung nisung ka asü.

Tsüngi yaloktsüba lendong nung nisung aika asüba osang angashia Bihar Chief Minister Nitish Kumar-i mangyim jashi lemsatepba den külemi takoksa angur kibong shia nem sen lakh

pezüzü (4) teyari agütsütsü, ta sangdong.

CMO sangdong ajanga, "Tsüngi yaloktsüba lendong nung Begusarai nung nisung pongu, Darbhanga nung nisung pezü, Madhubani nung asem aser Samastipur nung nisung ka asüba osang angashia Chief Minister Nitish Kumar jashir aser takoksa anguba kibongtem den mangyim jashi lemsateper," ta metetdaktsü.

"Chief Minister-i takoksa angur kibong shia nem sen lakh pezüzü teyari agüjang ta tuyuogo. Bihar Chief Minister-isa nüburtem dang tsüngsang-

mopung majungba mapang kidang nungi ayazüka maotsü aser Disaster Management Department-i tuyuba benshitsü mepishir," ta CMO sangdong ajangasa metetdaktsü.

India Meteorological Department (IMD-i April 9-10 anogotem nung Kishanganj, Araria, Supaul, Madhubani, Sitamarhi, Sheohar, East Champaran aser West Champaran district tem orange alert sangdonga liasü.

IMD-isa April 10 nü Kishanganj aser Supaul district na nung tzünglu sashia arutsü ta metetdakja liasü.



April 10, 2025 nü Chikkamagaluru nung Karnataka BJP Tir, BY Vijayendra aser MLC CT Ravi na den tangartemi state sorkar anema longkak aيتدang tangokba noksa nung angur.

RSS-i tarutsü nung Khristantem aser Sikh anema inyaktsü: Congress

Ahmedabad, April 10 (Agencies): Waqf Act dak sendakba nung sorkar maneni aija Congress Tir Mallikarjun Kharge aser Lok Sabha nung opposition lenir, Rahul Gandhi nati, Waqf Act ya yimsü temeden aser linük temzüng alema lir, ta ashi.

Muslim nunger anema inyakba sülen RSS-i Khristantem, Sikh nungertem aser tanga minorities anema inyaktsü, ta Congress-i metetdaktsü.

Ato kilonser Narendra Modi aser BJP-RSS aija Congress-i, parnoki tesempa proker, yimsü nung ajemdaker telemsa adokdaksür aser linük temzüng alema inyaker; Waqf Act ya sorkari yimsü nung ajemdaker yangluba asalentong shilem ka lir, ta metetdaktsü.

Rahul Gandhi-i, US Tir Donald Trump-i saru inyakyim tasen benokba ajanga rongsenkettsüng jenjang raksatsü, ta ashi.

Paisa, "Iba dak sendakba nung Modi-i ola kata madoker aser tang tashi mangur. Pa kong atsüka lir?" ta asüngdang.

Congress Tir Mallikarjun

Kharge-i, "Tarutsü nung tayongzükbä balala atema renemtsü melen BJP-i telemsa adokdaksütsü atema küm 500 tejen onüktem kakteter. Modi-i mi apur aser RSS-i mi nungji totzü shiloktsür," ta aitsü.

Paisa, Congress-i telemsa adokdaksüba aser tim masüba anema nüchiso atema tanabenbuba rarar, ta ashi.

Rahul Gandhi-i, linük nüchiso atema raradang Congress-i British aser RSS anema rara, ta ashiba den külemi RSS-i linük temzüng rongdoktsüba atema aitsü.

"Parnok tangatetbaji linük temzüng anema lir, parnoki democracy samatsüner aser reju ajak amokbanger rongsen ajak Adani aser Ambani na nem agütsüner," ta Rahul-i ashi.

1961 küm Gujarat nung All India Congress Committee (AICC) senden ayongzükbä sülenbo tang mezüng Gujarat nung iba senden ayongzükgogo.

April 8-9 anogotem nung linük tesem balala nungi Congress lenirtem 1,700 Ahmedabad nung adenshia onük balala nung o lemtepeggo.



April 10, 2025 nü New Delhi nung Union Minister of Health & Family Welfare, JP Nadda aser Delhi Chief Minister Rekha Gupta nati Ayushman Bharat Pradhan Mantri Jan Aarogya Yojana (PM-JAY) health cards agütsüdang tangokba noksa nung angur.

India-i ano Rafale tayimtsü 26 alizüktsü

New Delhi, Rongchii/April 10 (Agencies): Bodhbarnü Ato kilonser Narendra Modi leniba nung Cabinet Committee on Security senden amenba mapang nung France dang nungi sen crore 64,000 agi Rafale tayimtsü 26 alizüktsü atema telemtetba agiogo.

Item raraba tayimtsüji tayimtsü abenba INS Vikrant rong nung ayutsü.

India aser France na tsüngda tezüngzüktep agiba sülen küm pongu shi lir France-i raraba tayimtsütemji India nem agütsütsü.

2023 küm July ita nung defence ministry-i Rafale tayimtsü aika alizüktsü atema agizüka liasü.

India aser France nati senteper tayimtsü aser helicopter engine yanglutsü densema Defence cooperation projects aika tenzüka liasü.

Iba tezüngzüktep kübok Indian Navy-i France nunger Dassault Aviation nungi raraba hadir densema teyari oset balala angutsü.

Tamalen Indian Air Force-i Rafale fighter tayimtsü 36 alizükogogo.

IAF-i ano Rafale tayimtsü squadron ana nüngdakba agi maneni Rafale alizüktsüsa aküm.

Tesüba küm ishika tsüngda India aser France na tsüngda defence aser asalentong tsütsü tesendaktep kanga junga kümogogo.

Linük anatisa advanced defence technologies atema amalietpa inyaktsü tebilemba lir.

Küm ana tejaklen defence ministry-isa France dang nungi Scorpene submarines asemalitsü telemtetba agia liasü ajisüaka tang tashi nungbo Cabinet Committee on Security-i magizük.



TIR YIMYIM YIMOBILEM (EDITORIAL)

DIMAPUR FRIDAY, APRIL (RONGCHII) 11, 2025

Kechi meshitsü ?

Nisung shia pei pei kolok nung pei pei tangatetba enokja lir aser tenük agi masü saka iba kolok jagiang tangar dak repranger. Aji oda, tangarbaji nisung tajung süaka asenok kolok agi paji nisung tamajung amai angutsü akok, anungji pajibo nisung tajung ser nung asenoki majung amai bilemer. Kasaji, nisung kar asenok yaritsü arur ser nung asenok tenük agi masü saka tokolokibo parnokji asen dangi langka meshii arur amai angutsüa akok. Kasaji, asenok dangi tangar tulur, takar aser temeteter kar arudang, jet ta asenok kolok agi parnok nem kechi agütsütsü, koda anepalutsü ta masü saka parnok dang nungi kechi meshitsü ta asüba toang asen koloki arura, asenok kolokji meshimetsür kolok asütsü. Ano, mapa kar nung tajangzük angutsü atema asenok tangatetba aser temeten langka tagitsü ka yong yokra, asenok kolokji alar kolok asütsü. Item kolok adenertemji asenok asü ta bilemdangtsü atema tanü iba onük ya tazünger tajungtem den lemsateper. Aji oda, asenok kolok nung tangar dang meshitsü aser asen temeten tangar dang ayoktsü bilem tashi asenok kecha nunga lenir mesütettsü aser kibur-a mekümtettsü. Iba ama kolok adenertemji, asenokibo manganütsüa akok, saka asenok lir. Tatishitsü agi, asenok arogoi mesüra yimtaki America nunger kar arunung, asenoki parnok nem kechi agütsütsü ta masü saka parnok dang kechi meshitsü ta dang asen koloki aitadoktsü, kechiyong asenoki parnokji tagütsür arur amai bilemer. Iba jagi asenokji memeteti parnok tsüngdang meshimetsür kumadoker. Kasaji, asenoki benjongbentsü sentong ka yanglur aser yangji nisung ka tongti tesemdang asütsü jaoker aser arudaktsür külen tenla tapu tapu meshir. Aji oda, shitakba agibo asenoki asenok den pelateptsü jaok nungji akok tashi tejaoker pelatsüsa sentong tajung agia chiyonga jemer yoktsüla saka asenoki jaoksangjibo meyipa aodangbo tapusema dena apusema agütsür aotsüsa asenok meshimetsür kolok adenertemi inyaker. Ibaji odangbo masü saka asenok dak tangar dang kechi meshitsü ta dang bilema aliba meshimetsür kolok dena aliba agi inyaker. Aji oda, anogo ishika lir külen taruba Monupii (May) ita tetenzüklenbo asenoka tesem tesem nung Moatsü benjong amongtsü sentong renema alitsü. Iba benjong sentongtem nung tayongertemi pei pei nük dak sülok tongti tesemdang asütsü asoshi tetemsü nisung bushia alitsü. Ashiko, item nisungtem nemji shitakba akhüm agüja pelateptsü jaoker masü saka benjong amongba sentsü menokdaktsür külenang, ano anüngtsüsa tenla meshitsü tebilemba nung jaoker asütsüa akok. Atangji, benjongi arur asünungji, yimya agi, tejaoker jagia teka tazüngbo marutsü saka benjongi jaoka yur parnok dang nungi tenla tajung angutsü imlara, iba benjongjibo meshimetsür aser alartemi ayongba benjong asütsü. Aji oda, yimten yimsüsür ka benjongibo jaoka ayu saka pa nem agütsüba sempet dang nungi teimba aser talangba list ka yanglur asenok nüngdak meshira, ibajibo asen sobaliba masütsü. Aji oda, benjongi jaokba tetezüji pelateptsü jaok, anungji agütsütsüba mapang ashi, temeshitsüba mapang masü. Aji meteta asenoki jaokertem den pelatepa tepela aser tenüngsang o dang jembia benjong dang amongtsü bilema benjong sentong renemra, iba jagi asenok kolok aienba aser uluba sayutsü. Asen nüngdakbo zünger mezüngma aser meshir memeshima alitsü saka benjong amongba anogo ya alima tembangba anogo masü, asen nüngdak jembitsü aser meshitsüabajibo benjong sülena anü aiben adoktsü, anungji benjong nungji dang pelatepa monger senshira, tanaben ajurutep dangbo memeshidangyongi par kolok agi asenok nüngdak reprangteta agütsütsü. Aji oda, asen sobaliba nunga agütsütsü mapang ka aser meshitsü mapang ka ta lir, anungji makayonga memeshitsüba mapang nungbo memeshi timtemang arema atar. Joko, asenok dakbo tangar ajuru majuruka kechi meshitsü ta asüba kolok masü saka nia kechi agütsütsü ta asüba kolok dena alitsüla.

OLEMSABANG

MOLUNGKIMONG LITERATURE BOARD-i ZÜLUBA: OSEMLOK

~ Rev. Tamsü Imchen

(Yashi adok nungi...)

1879 nung Dr. Clark-isa arogo züngsem 17 aliba indang report yokba lir saka 1879 statistical table nung Station tenüngji Amguri ta amshia lir aser iba ya pa Amguri nung amungdang züluba shidi nung ajemdaker enokba lir kechiyong iba kasa table Church Membership nung Hill Tribes- 17 ta agüja lir. Iba Sixty-Sixth Annual Report reprangdangra The Nagas ta asüba tsünglanglen AMGURI - Rev. E.W. Clark and wife. SAMAGÜTING - Rev. C.D. King and wife ta zülua lir. Iba dak alia 1879 nung Naga Church belenba indang kecha nunga zülua mali aser Dr. Clark-i tamangertem ajak pa den, tetezü Molungyimsen nung dang aliba shia lir.

1880 nungbo Naga Church nung züngsem 19 akümba indang shia lir aser yangi Station ji Molongkong ta agüja lir. Iba report nung Dr. Clark-i Molong ta ser shity züluba lir.

1881 Merangkong yimdak Arogo ka metenzük tashi Molungyimsen nung dang Khristan baptized members metangdangi aruba kuli angur. (In the middle of the rainy season, Godhula, who is in charge at Merangkong, baptized there eight persons; and a church was formed. Of those eight baptized, one has died : so the Merangkong church numbers seven persons. The church here at Molung now numbers thirty members; six were baptized during the year, and one has died. Mission to the Nagas, Sixty-Ninth Annual Report, 1883)

Anungji item kuli ajanga Dekahaimong yimdak Dekahaimong nunger Dr. Clark-i tzü nung baptia arogoji tenzük saka tamangertemji kümshia ajema aoba tensa ka nung Molungyimsen yim kümer Naga church members ajakji Molungyimsen nung dang aliba record nung lir aser tamangertem züina akümba indang record nung zülua angutsü.

Iba mapang nungji Molungyimsen dak alaka Khristan baptized members aser arogo (church) tanga yimdak aliba indang Dr. Clark-i report agütsüba nung shia mangutsü. Kodang Merangkong nung Dr. Clark teyari ajanga Godhula-i arogo ka tenzük idangji iba report nungji Molungyimsen aser Merangkong yim ana nung Khristan baptized members aliba dak alaka tanga yim shinga nunga Khristan baptized members aliba indang shia mali. Sürabangla Khristan baptiba members makara arogo (church) lir ta küm aika sülen ang jembiba aser züluba jagi kodanga tesüiba missionary tem reports raksatsütsü makok. Dr. Clark aser tamangertem jagi Molungyimsen yimji kuma mao asübo Ao lima nung Khristan baptized members samaa aotsüba tia ka nungi kümüzük ta Dr. Clark record ajanga angateter.

Dekahaimong (Molungkimong) yimdak arogo tasen ka tenzükba indang Dr. Clark-i yamai zülua lir.

The Naga Mission. Rev. E.W. Clark. Amguri, April 31, 1893

The year closing with December, 1892, presents no startling facts. One new church has been formed. It is in the village where the first baptisms were performed in the Naga hills. It was because the Christians were persecuted so much in this Deka Haimong village that they were induced to form the new village Molung. But the chief persecutors have died; several Christians have gone there from other villages. These were formed into a church, and three were baptized, two of the three being chief men of the village.

Deka Haimong Church: Feb 27, 28, 1892. (Nokinketer Mungchen, Tapu VII. SI. No. 2)

On Feb. 27 there was a meeting with the missionary at Deka Haimong, of the converts who desired baptism. The teacher was also present. After a relation of Christian experience three men were deemed worthy of baptism. On Sabbath, the 28th. there three men were baptized, viz Suakkü, Tsvknungnokshi and Kimung. On Sabbath evening there was a celebration of the Lord Supper. At this time also a church was formed at Deka Haimong Village of which the following are the names. Suakkü, Tsvknungnokshi, Kimung, Rongsenchiba and his wife Tongpangkokla, also Tsvknungtoba. (The three from Yajang Church). Also from Molung, Akangba. Imliba, Talikaba, Imnameri and Mangyanglemla. These persons constitute the Baptist Church of Deka Haimong. In 1839 (1893) Pamila and Imnanoknen (Lokland) moved to Deka Haimong from Molung; so did Imbangla. Tongpangkokla wife of Rongsenchiba died 7 Sept. 1893. 1 Jan 1894 Membership 13. 16 Aug 1894 died Tsvknungnokshi. Sd/- E.W. Clark.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

UK House of Commons nung Khristanem reshikangshi atema o entep



April 10, 2025: April 08, 2025 nü UK House of Commons nung alima tesem balala nung Khristanem reshikangshiba tebilemtsü onük nung o entepogo, ta International Christian Concern (ICC)-i metetdaksü.

Yimjak nung Parliament nung o entepba ajanga sorkar aser yimtenren lenirtemi Khristanem reshikangshiba aser tamangba yimsü temeden jenjang angatettsü.

Labour Party züngsem aser Newport West & Islwyn nungi Parliament züngsem, Ruth Jones leniba nung o entepba sentongji agi.

Okila jembidang Jones-i, alima nung yimsü tulutibaji Khristan yimsü lir, ajisüaka region aika nung reshikangshi tali ajangshiba tamangertemji Khristanem lir, ta ashi.

Laisa, reshikangshiba ya kuli balala nung ajemdaker lir, aser item rongnung Islam yimsü alia

amangba, Marxist yimsüsüba aser kijai tashi alia amshiba sorkartem densema lir, ta ashi.

Laisa, reshikangshibasa süaka talisa tetsürtemi ajangshiba timtem nung rangloker inyaksüla; house arrest asüba, kangshia kiyimdaksüba, alima tesem balala nung Khristan tetsürtem maaksüsüba aser lenla anasü (Khristan asüba agi aser tetsür asüba agi) reshikangshiba anema inyaksüla, ta ashi.

Khristanem reshikangshiba reports aser data balala nung ajemdaker Jones-i, alima nung Khristanem tamajungtiba reshikangshiba linükji North Korea lir, ta ashi.

"North Korea nung Khristanem reshikangshiba jenjang yakümsa tamajungba liasü, aser ibaji talisa 2024 küm tetenzüklen North Korea nung ketdangsertemi özüng tesashi aika benokba agi lir," ta laisa metetdaksü.

O entepba mapang House of Commons nung züngsemtemi, alima tesem balala nung Khristanem reshikangshiba ya sangdongtsü atema U.K. Parliament-i maneni inyaksüla, ta ashi.

Parnokisa, linüktem tsüngda senden amendang aser sabang balala nung UK ketdangsertemi Khristanem reshikangshiba tebilemtsü lemsateptsüla, Khristan refugee tem tanaben UK nung jenokdaksütsü atema inyaksüla aser yimsü temeden atema inyaker U.K. special envoy nungita yaritsüla, ta ashi.

Conservative Party züngsem, Danny Kruger-i, "Alima tesem balala nung Khristan yimsü atema tongti tsükchirji tanga yimsütem aser tangatetbatem lir, talisa China nung Marxism, India nung alia oa amangba Hinduism aser alima tesem balala nung alia oa amangba Islam yimsü lir," ta metetdaksü.

Paisa, "Tatemsas teimla aliba olen ka nung tembangtsü, atangji teimla temaitsütem lir. Alima nung sayatenya aika atalokdar. Khristan yimsü ainba aser asentenshiba temaitsütem ngudar. China nung house church movement ajanga nisung million aika temelung meyiper. UK nung ni tasü itshir. Bible Society report ajanga tang 'The Quiet Revival' lir ta shiogo. Item kuli ajanga UK nunga asen yimsü ainba angur. Iba nungji ajemdaker tarutsü atema teimla lir," ta ashi.

ANOGO ABEN TSÜNGREM DEN

Amajok Nung Timtem

"Arung, asenoki Kibuba dangi meyipdi kechiyong pai shisatsü, aser pai asenok aneptsütsü. Pai azük aser pai asenok aleptsütsü" (Hosea 6: 1)

"Kechiba tajunger dak tamajung ataloker?" Iba tasüngdangba ya temulung süa melangzür. Laishiba nungi Tsüngrem yimya angatetba ajanga iba miim o lapoktsü sapi agütsür.


Ajaki Tsüngrem tenüng meteta lir. Jehovah-Jire aser Jehovah-rapha. Saka tenüing ka ajanga Pai pasasa jungkai adok. Jehovah-Makkeh, tetezü, "Ni Kibuba shibai azüker apushitsür" (Ezek. 7:9)

Tsüngremi metongshitsüba temoatsü indang Yob tembar kati ashi, "pai yirutsüaka, Pai ano aneptsü. Pai azüker saka pa teka agi aneptsür" (Yob 5:17-18). Anüngdang aser aonung anapronglaji Tsüngrem meyong (T. Ken 74; 16). Tsüngrem yimjung anogo, aser tokrong anogo: kata kata yanglu (Sayu 7: 14). Tajung aser tamajung ajak tematiba nungi lir (Aiatai 3:38).

Ibri tapu ajaklen Khristanem asoshi tapet lir. Khristan takümü tasemtepba ka lir (Ibri 12: 1). Tasemtepertemi temang koba agi taret kümdaksür, item menüngdakba taret ajak endoker tasemtepdaki ayir. Kodang menüngdakba mapa nung asenoki nokdaker, Tsüngremi mepelar, ain adoker. Sarasadem mapang auyadaksüba nung pelaa malir. Asen taküm-i pa uludaksütsü asoshi süngyanglu mapatem asen taküm nung melidaksütsüla (Isa. 2: 17b, 18).

Nai mulungba timtem tokrong ajak aremtsü, Ne taochi kua.

Cru Ministry-i Jesus film oshi 2,200buba nung meyipzükogo



April 10, 2025: Orlando, Florida nung amenoka aliba Cru Ministry indang Jesus Film Project-i Jesus film oshi 2,200 nung meyipzükogo. Iba film oshi 2,200buba nung meyizükba oshiji West Africa kübok Côte d'Ivoire nung Kulango nunger Bouna oshi lir.

March 28 nü Jesus Film Project-i iba osang metetdakja liasü.

Cru Ministry-i ashiba agi, Jesus film ya linük ajak nung amai sayuogo, aser iba ya ajanga oshi balala jembiba nüburtemi Khrista osangtajung angashitsü maongka angur aser Kibubai tenyaba wadang tuluba renemtsü atema inyakba nung yarir.

Tamalen iba film ya alima

nung oshi teimtiba nung meyipzükba film lir ta sangdonga liasü. 2012 küm July ita tashi nung iba film ya oshi 817 nung meyipzükler liasü.

"Tanü tashi alima nung oshi teimtiba nung meyipzükba film ji iba film ya lir," ta parnoki metetdaksü.

Jesus Film Project nung Executive Director, Josh Newell-i, "Yisu otsüji tan putu nung tapetba, aser iba otsü ajanga alima tatembang ajak atongtsü," ta ashi.

"Tanü tashi alima nung Yisu tenüng kodanga mangashidangba nisung billion aika lir ta asadangteter. Ajisüaka taruba küm 10 tsüngda nisung ajaki Khrista

osangtajung angashitsü atema sentong ka renema lir," ta pai ashi.

Küm 25 tejaklen Newell aser pa kinüngtsü, Holly nati Côte d'Ivoire den arrtsüa aliba Burkina Faso semdanga liasü, aser yangji Jesus film ajanga nisungtem kongshiba kuli angu.

"Tatembangbuba anogo nung onok meina senzür Laishiba translator kati küna jila tezüleni anir ao. Iba sülen onok tenem kati anir atu. Iba nungjagi lai onok dang 'tip külenji reprangzüka yokang, ni arrtsüji adena yimtsüngtem jagi mouteter, aser parnok oshi angazüksü makoker. Kenü anogobo item yimtsüng tonga otettsü atema asenoki sarasademdi' ta ashi," ta Holly-i metetdaksü.

Ajioda Newell aser pa kinüngtsü nati kenü anogobo Khrista osangtajung agi Côte d'Ivoire atongtsü atema parnoki sarasadena liasü.

Tangbo yangji Bouna Kulango oshi jembir 300,000 shi lir.

"Mission ji ibaji lir. Onoki ajak den aser tesem ajaklen Yisu osang metetdaksütsü," ta Josh Newell-i ashi.

Cru ministry-i ashiba agi, Bouna Kulango nütsüng shilem ishika dang Khristanem lir; nütsüng teimbaka akhi yimsü amangertem lir.

Ministry nung inyakerteri kobi melii Bouna oshi nung Jesus film ji sayatsü tebilemba lir.

Iba film ya oshi 1000 nung meyipzüktsü atema küm 32 tashi agia liasü, ajisüaka tanü putu

technology ajanga tesüba küm 10 tsüngda kija nung ano oshi 1,200 nung iba film meyipzükogo.

Jesus film oshi balala nung meyipzükba aser recording mapatemji Jesus Film Project-i local Arogotem, organizations aser volunteers teyari agia inyaker.

1950s mapang nung Cru tentetsang (tamalenbo Campus Crusade for Christ ta aja), Bill Bright-i Yisu Khrista taküm otsü nung film ka adoktsü atema mangdang yur iba Project tenzüka liasü. Cru evangelism atema asalentong yanglur Paul Eshleman-i Warner Bros. den senteper iba mangdangji ataloktsü.

Paul Eshleman'er jala aser Cru ministry her. BIBLE nung

communication coordinator, Jennifer Eshleman Huff-i tamalen Cru blog ka ajanga tebu nem akhüm agüja liasü.

Paul Eshleman ya 2023 küm May 24 nü süogo.

Jennifer-i, "Film ajanga alima den Khrista osangtajung lemsateptsü atema iba mission ya kübu mangdang liasü, aser iba mangdang atangji ataloktsü atema pai pa taküm rangben bendanga agütsü. Sannüker kati samaba san bushitsü atema san 99 toktsür aoba (Mathi 18:12) ama kubuia ajaki Yisu osang angashitsü temsüa lir ta bilem," ta metetdaksü.

"Jesus film oshi 2,200buba nung renemba atema asenoki benjunger, ajisüaka iba mission mapa ya ano metembang.

Kubu-i Khrista osangtajung agi matongba teloktem 'list' ka amer senzü. Osangtajung agi matongba rogotemji shirnok aser asenoki komaser parnok atongtsü? ta pai shisadanga liasü. Kibubai tenyaba wadang tulutiba kanga rongdak süa inyaksüla ta pai bilem aser Tsüngrem tsüngdang ajak senti, ta pai onok nem nenshia metetdakja aruogo," ta laisa metetdaksü.

OFFICE OF THE LANGPANGKONG KAKETSHIR MUNGDA

Langpangkong Students' Conference

H.Q. Chuchuyimlang - 798614. Dist. Mokochung : Nagaland
Email : Langpangkongkaketshirmungdang@gmail.com

TENÜNGSANG AGÜTSÜR



Langpangkong Kaketshir Mungdang(LKM) H.Q Chuchuyimlang ajanga **Sp. Namang Yimong, Wb. N. Chingmak**-er jabaso-i, Yaongyimi Old Yimtak nungi Nagaland Super League 2025 nung Langpangkong nungur ajak nūma atangtsūsa Khunang tulu bener arunung pa nem Tetushi aser Tenüngsang tulu agütsür.

Sp. Namang Yimong ya Longterok FC nungi Jersey number 12 semer asaya-a liasü. Iba asayamung nung pai "GOLDEN STAR" Naroküm tulu ngutetta liasü. Pai kum 20 ser tekubok asayar ayika rung nungi kanga bendanga agüja aser pai tajungtiba asayaba ajanga par Club dang masü saka Langpangkong nungur ajak nūma atanger.

Sp. Yimong ajanga iba Khunang tulu nyugetba ya Langpangkong nungur asayar Lanurtem asoshi teyimla tulu ka yutsür asütsü. LKM Mungdangti ajanga maneni iba takok asoshi pa nem tetushi tulu agütsür aser tarutsü nunga yamai meranga asayatsü pa aser lanur asayartem ajak ajungshir.

Tsüngrem-i pa taküm wadang ajak nung takok agüjangma ta LKM sarasadem.

Sd/-
IMLINOK
PRESIDENT, LKM

Sd/-
MEYITONGPANG
GENERAL SECRETARY, LKM

MULUNGNEN O



"Ni rara tajungji raraogo, ni alizüing tonga asemogo, ni tamangji yuogo" 2 Timoti 4:7

Onoki teti meima aliba **Asür TINUREBA CHANGKIRI** akumilir wadang tembangba mapang ozü den temeim, sarasadem aser ariabilema nokdaker ajunga dang ozü temulung taroktiba nungi pelaba lemsateper.

Nenok nūbu, anisüngzütsü o aser lenmang balala nung yaritepba ajanga ozü mangyim mapang tashi agütsü.

Nenok kija shia tenüing metetshiaka iba sapang ajanga ozü tepela lemsatepba agizükangma. Nenok temeim asoshi Tulusang Tsüngremi nenok mulamushia moajang ta ozü sarasademtsür.

Temeim nung,
Kinungtsü, Jala, Anük-apang, Semchir aser Kinungertem.

ALI TAYOKTSÜ LIR

1. 3 Pura. Foothill road tangshia 150 per sq.ft
2. Foothill lemapang Teak lu anasa, 120 per sq.ft
3. Showuba fly over anasa 190 / 250 / 310 per sq.ft

~ Contact : 9863826159



GOVERNMENT OF NAGALAND

DIRECTORATE OF TECHNICAL EDUCATION

Nagaland : Kohima-797004

NO.DTE/SCTE/6/2023-24/7297

Dated, Kohima the 9th April, 2025

NOTIFICATION

NO.DTE/SCTE/6/2023-24: In continuation to the office Notification of even No. dated 28th February, 2025 prescribed Application Form submission to undergo 3 (three) years Diploma Courses in Government run Polytechnics for the academic session 2025-26 is extended till HSLC/HSSLC 2025 result is declared.

Sd/-
(ER. VIPULHOU LHOONGU)
Director

Ukraine nung Russia asoshi rarar China nung 155 lir: Zelenskyy

Kyiv, Rongchii/April 10 (Agencies): Rara nung Russia atema rarar China nung 155 shi lir, ta Ukraine Tir Volodymyr Zelenskyy-i ashi.

Hopta tetenzüklen China nung ana apuba sülen pai iba osang ya sangdong, anungji China-i Russia nem nūbu agütsür ta Kyiv-i yimjak nung tai tongloksüba ibai mezüngbuba alitsü.

Bodhbarnü osangbener tem den jembidang, par sorkari osang bendenba nung ajemdaker iba rara nung China nungeri shilem agiba ano aika lir, ta Zelenskyy-i nenshia ashi.

Brehostibarnü China sorkar indang odongtar kati nüngdakba telok tem dang China shilem kanga junga aser shidak angatetsü aser junga meshisadangi o mejembitsü shia liasü.

"China ya Ukraine timtem adokdaksüra masü mesüra yangji shilem agira masü. Timtem nung yimjung asoshi onok akang-akanga nokdaker aser yimjung ajungkettsü meranger," ta foreign ministry odongtar Lin Jian-i ashi.

China sepaitem Russia asoshi raraba ya par juri tashi nung inyaker lir ta shiner ama taoba mapang sangdongba pai lephsia ashi.

China-i teti nūburtem dang rara adoka aliba tesem nungi pila alitsü aser yimya kecha nunga rara nung shilem magütsü, talisa military operations nungi pila alitsü ashir, ta Lin-i ashi.

Taoba mapanga par nūbur aika Russia asoshi rarar ta tai tongkoktsüba magizük aser

item tai tongloksüba ya shidak masü ta Beijing-i shia liasü.

Zelenskyy-i hopta tetenzüklen sangdong ka nung par sepaitemi Ukraine anüdoklen Donetsk region nung China nungur sepai trok den rara aser ana apu ta shia liasü. Iba tatalokba nung Russia-i telangzüba agütsütsü memulung.

Zelenskyy-i ashiba agi item nisungtem ya Moscow nung training agir sülen Ukraine nung tongpang leni raratsü yoker aser migration documents aser taa agütsür.

Pai social media X nung video ka prokshiba nunga pua aliba China nungur sepai ana dang asüngdangyar ama liasü.

Mandarin Chinese oshi nung sepai ana yagi parnok kong nungi aru aser parnok koma apu ta asüba shia liasü.

Tena rongnung kati iba ya pa asoshi duty nung mezüngbuba aser raradak mezüngbuba lir ta shia liasü. "Ya masüadang ni kodanga prangbong mekhadokdangi liasü," ta pai ashi aser pa ya Russia sepai ka den külemi apu ta ashi.

Pai ashiba agi, pa ya nisung telok ka nung China nungur sepai ana dener liasü aser parnok ya rongrongshirong mapang balala ajum. "Nisung ajak prokshi, parnok tasü asü takum aliar ni memetet," ta pai ashi.

Tatem nung pa Russian sepaitem den külemi temai adoka bendanga agütsü ta ashi.

"Tashiyim amshia raraba mapang Ukraine litsü nung China nungur tsükchir ama shilem agiba ya rara tuluba kumdaktsütsü mechi asaa mera agiba aser Moscow-i maneni

aranüba sayur ta Ukraine-i amanger," ta Zelenskyy-i X nung ashi.

Pai US aser tanünga linüktem dang telangzüba agütsütsü ayongzüik.

Washington-ia China nungur Russia asoshi raraba osang yagi meinpronger ta shiogo.

China-i neutral nung alitsü sangdongba nung Ukraine-i taoba mapanga tamang makateti liasü. Zelenskyy-i taoba mapanga Russia indang hadir nung shilem ka ama Beijing-i teyari oset agütsür ta aitsü aser seplasepshi masütsü ayongzüka liasü.

Russia-i injang-bomb, armoured vehicles aser missiles yangluba nung China-i yarir ta taoba mapanga US-i tai tonglokja aru. Ano computer chips aser drones amala commercial aser military nung amshitetsüsa technology tem Russia dangi yoktsü aliba 'dual-use technology' parnoki tendanga liasü.

Beijing aser Moscow ya yimtenren aser rongsenketzüng tsütsü tesendaktep tajung lir, aser China-i iba rara nung neutral party ka ama sayur aser Russia nem mitkar oset magütsür ta aiben shiogo.

Par-i Moscow den shishilempaba bhukuma jembia parnoki nok-nü tesashi mayoker aser ozüing agi melaba ama 'dual-use items' kanga kumdanga bener oa ayoker, ta ashi.

Russia indang Kursk Oblast nung North Korea nungur sepai yirur aliba ana Ukraine-i apuba sülen China sepaitemi Russia asoshi rara ta tai tongloksüba ya angashir.

Bangladesh court-i Sheikh Hasina aputsü totuyuba tasen agütsü

Dhaka, Rongchii/April 10 (Agencies): Bangladesh nung aliba court kati ato kilonser menden nungi atsüngdoker alila Sheikh Hasina, lar jala Saima Wajed Putul aser dangar nisung 17 tashi ochimashi ken o ka nung aputsü Brehostibarnü totuyuba agütsüogo. Parnok yagi nisung aliba ki ka ashikülak yimya amshia agi ta tai tonglokja lir.

Anti-Corruption Commission (ACC) ajanga agütsüba charge sheet ya Dhaka Metropolitan Senior Special Judge Zakir Hossain Galib-i agizük.

"Ken o nung ACC charge sheet agizüka Metropolitan

Senior Special Judge Mohammad Zakir Hossain Galib-i warrant ya agütsü," ta ACC prosecutor Mir Ahammed Salam-i osangbener dang ashi.

Dhaka anasa Purbachal area nung RAJUK ajanga tapu ama amshidaksüba ali ken o dak sendakba nung judge-i ACC dang par bushisüngdangba osang ya May 4 nü agütsütsü ashi. ACC ajanga taoba ato kilonser aser danga sorkar ketdangsür tem anema ken o ya January 12, 2025 nung benoka liasü.

Iba charge sheet nung ashiba agi, Hasina'er jala Putul-i RAJUK majangi ali agitsü asoshi tim masüba yimya

amshia tetsü Hasina mesüzüka aser Purbachal New City Housing Project nung ali lemzüksütsüba yimyatem nung aibelen.

Dhaka nung RAJUK indang jurisdiction kübok ali kimong liaka Putul-i iba mapa inyak, ta ACC-i ashi. La ya November 1, 2023 nungi tang tashi New Delhi nung WHO South East Asian regional director menden bena lir.

Meinchir anema mapa tamajung inyakba aser tashiyim amshia samadaksüba atema Bangladesh indang International Crimes Tribunal ajanga taoba mapanga Hasina aser dangar tem anema arrest

warrants anaben agüja lir.

"Mujib Centenary" benjongmung mapang Hasina, Sheikh Rehana aser taoba ketdangsür kati Bangladesh sen Taka 4,000 crore mashi lenmang nung amshi ta tai tonglokja ACC ajanga bushisüngdangba sülen tang tesüsa aputsü ozüing ya agütsü.


2020 küm tepiyong benjongmung ya Awami League yimsüsüba mapang Bangabandhu Sheikh Mujibur Rahman indang centenary liasü. Rehana yagi ketdangsür mapa kecha inyakba meliasü, aser taoba mapang principal secretary inyakba alisang Kamal Abdul Naser Chowdhury ya

mapa nungi anisüngzüka sülen iba benjongmung indang coordinator ama inyaka liasü.

ACC chairman Mohammad Abdul Momen-i ashiba agi, jenjang balala liaka ochimashi mapa inyaker ajunga kasa amshi. Hasina anema ano nisung jenti tepsetba aser tashiyim agi samadaksüba ken o Bangladesh indang International Crimes Tribunal nung benoka lir.

Iba tribunal ya shidakbabo Bangladesh indang 1971 Liberation War nungi Pakistani collaborators tem obendangtsü asoshi amenok aser taoba mapanga parnoki nisung kar merenshiogo.

35+ Mokokchung Football League 12th April nungi asayatsü



35+ Mokokchung Football League ayonger (achichilen nungi) season 6 convenor, Aongsen Aier den asayamung achayanger - Dr. Lanu Walling, Imcharen Lusang aser Sentianger noksa nung angur. Mokokchung, 10th April, 2025.

Mokokchung, 10 April (April): 35+ Mokokchung Football League (35+ MFL) Season 6 buba 12th April, 2025 nungi yangi Imkongmeren Sports Complex, Mokokchung nung asayatsü renemdaki, ta tayongertemi tanü Urban Hub Café nung osangbener senden ka nung metetdaksüogo.

35+ MFL tenzüker küm pezübuba arur aser taküm agi season 6 buba agitsüba lir. Iba league ya shisa ajemer (bangpur) nisung ishika lungjemer tongtibangsa kadi ka metetepa temba yimteptsü, lungjema alitsü aser temang anema lidaktsütsü nükjidong yur tenzüka lir, ta 35+ MFL senior member, Lanu Walling-i metetdaksü.

Season 5 tashi iba league takok ngua asayaogo, aser season 6 buba 12th April, 2025 nungi Honibar shia Imkongmeren Sports Complex nung asayatsü. Taküm iba league nung club 6 - Nova SC, Wasang FC, Trebuchet FC, Terokroker FC, New Ecclesia aser Revenant FC-i shilem agitsü. Iba league ya taküm küm tatemlen November tashi asaya-a aotsü, match ajak senteperbo 75 shi adoker, ta taküm iba Season - 6 ,

Convenor, Aongsen Aier-i metetdaksü.

Iba league nung shir club-i points teimba ngudir par telokji champion asütsü. Champion nem senpet sen den trophy aser kulikaket aser runner-up tashi atur nema sen den kulikaket agütsütsü. Iba den nija senpet kar shima senpettsütsü. Taküm mapa tasen kaji - match asaya shia best player kaka shimtsü aser iba senpetji Mokokchung Unique Bakery puri renemtsütsü, ta tayongertemisa metetdaksü.

Taoba mapang Nagaland nung Mokokchung district ya football asayar tajung adokdak ka liasü, saka tanübo akhi amato masü, anungji, Mokokchung nung "football asendenshi" nüngdaker. Ibaji tenzüka aotsü asoshi Under 14 league ka tenzüksü aser ano coaching sentong kar ayonga nüngtugu coach jaoktsü tebilemba lir, ta parnokisa inyaka aotsü sentong kar lemsatep. Football nung "grass root" ya kanga tongtiban, aji oda, sentong balala inyaka aotsü atema tsürabur aser telok balala nungi teyari nüngdaksü, ta parnokisa shisem.

35+ Mokokchung Football League ya tanga league amai

masü, iba league yabo asayartem, shilem agiba club aser temulungertemi senotsü aser tenla balala tenlateper dang asayamung ya achayanger, ta tayongertemisa iba asayamung anepaluba maparen kar lemsatep.

35+ MFL Season 5 buba tashi asaya-a arudang tajanzük anguba kar lemsatepdang, nisung aika asentzü sentokba ajanga temang pongba aser yakyaka akümba, achiajemertem karbo iba ajanga pei taküm azüokba, ano lanurtem aika iba league nung shilem agitsü yongyaseta atatepba angur, jangratemtsükaji iba league nung arishi küm 56-57 tain dena shilem agir aser ibai veteran footballer-tem asoshi sempet arangshitsü sabang tajung rongnung ka lir, ta tayongertemisa metetdaksü.

Iba league ya Honibar shia asayar, anungji, azünga alirtembo arua asaya reprangtsü asoshi parnokisa mepishia metetdaksü. Season 5 asayaba tashi nung Revenant FC-i dang season ajak atonga atonga koka lir. Season 6 buba jia Revenant FC-i dang abentsü asü mesüra tanga club tasen kari abentsüar shingaia meshiteter, ajakji mapangi dang bener arutsütsü.

Inter- School State Level Subroto Cup indang metetdaksü

Dimapur, Rongchii/April 10 (TYO): District Sports Officer, Mokokchung, Zhopovi Zecho-i sangdong ka ajanga, Youth Resources and Sports department-i under-15 Boys aser under-17 Girls category atema Inter- School State Level Subroto Cup International Football Tournament 2025 ayongzükba metetdaksüogo.

Iba asayamung ya July ita mezüngbuba hopta I.G. Stadium Kohima nung asayatsü renema lir.

National Level asayamung ya August 18 nungi September 25 tashi asayatsü.

Iba asayamung nung shilem agitsü jangraba school tem ajak dang District Sports Office, Mokokchung nem April 24 nü tashi nungbo asayamung nung shilem agitsü agizükba shiti benoktsü metetdaksüogo. Osang tejangjaba agitsü atema iba number: 8798437988 nung t o n g t e p r a t e p t s ü metetdaksüogo.

Meghalaya team-i Paris nung takok tajung angu

Rongchii/April 10, 2025 (Agencies): Paris, France nung 2buba Indo-French Football Tournament 2025 nung tasembuba jenjang nung tembanga takok tajung anguba atema Meghalaya Chief Minister Conrad K. Sangma-i, Myngken Christian Higher Secondary School, Ri Bhoi district nungi asayartem tushio.

Team nung asayar 16 liasü aser parnok ya Meghalaya sorkari senotsü teyari agüja France club FC Versailles, Sarcelles FC aser Grigny FC nung den toktepba liasü. Iba asayamung ya FC Versailles-i akok aser Sarcelles FC tanabuba jenjang nung liasü. Maneni Meghalaya FC aser Grigny FC na tanabuba aser tasembuba jenjang nung liasü.

Sentong nung Chief Minister-i, Meghalaya Football Team-i takok tajung anguba atema parnok nem tenüngsang agütsü aser iba ya state atema dang masü saka linük ajaka atema tongtiban mapang ka lir ta ashi. Paisa, Saisabong koda tongtiban aser talisa, yimayimpong yanglushiba aser fitness atema koda tongtiban iba indang lemsatepba den lanurtem nongita yaritsü atema sorkar bendanga agütsür aliba nenshia metetdaksü.

Meghalaya sorkari sports

infrastructure ajungkettsü atema taoba küm 6-7 tsünga sen crore 1000 dak tema intokogo, kong artificial turfs ground 50 yangluba aser Meghalaya ya football powerhouse ka kümdaktsütsü atema grassroots football jenjang ajungketshiba densema lir.

Maneni Chief Minister-isa, Olympique Lyonnais academy-i June ita anogo 20 atema training camp ka asoshi Meghalaya Football Team Under-18 jaokba metetdaksü.

Chief Minister-i, Mawkanu nung NEUFC-i Centre of Excellence amenokba densema sorkari saisabong ajungkettsü atema jenjang agiba lemsatepba liasü. NEUFC indang Centre of Excellence ya India nung residential academy tajungtiba rongnung ka asütsü.

Sentong nung Meghalaya Football Association tir Hamletson Dohling; D.D. Shira, MCS, Director of Sports & Youth Affairs; Sunesh Syiem, Secretary, Meghalaya Football Association, Bobby L. Nongbet, Head Coach cum DSO, Nongpoh; aser Sports & Youth Affairs Department nungi tanga ketdangsürtemi shilem agia liasü. Myngken Christian HSS nungi principal aser tesayurtem aser asayar kinungertemisa sentong nung shilem agiogo.

BFI achaayangtsü atema WB-i interim committee shimtsü

Rongchii/April 10, 2025 (Agencies): Boxing Federation of India (BFI) maneni inyaksangshiyonga aotsü aser domestic aser international asayamungtem achaayangtsü atema World Boxing-i interim committee ka tentettsüogo.

World Boxing tir Boris van der Vorst-i BFI mendenbuba Ajay Singh nem züngsem trok agi kümtetba committee ka tentettsüba metetdaksüogo.

Committee ya Singh lenisüba nung inyaksangshitsü, saka anogo 90 dak tema inyaksangshi masütsü.

Züngsemtem rongnung BFI Vice President Narender Kumar Nirwan, Executive Director Arun Malik aser Olympian L. Sarita Devi nung densema lir.

Tanungba züngsem ana ya Indian Olympic Committee (IOA)-i IOA tir aser züngsemtem den sensak asemba sülen nominate asütsü, ta April 7 nü yokba shiti nung shia lir.

IOA tir PT Usha-i tang tashi züngsem ka danga nominate süa mali.

Singapore Boxing Association tir Fairuz Mohamed-a committee nung züngsem ka asütsü. Pa ya observer ka ama World Boxing nungi representative ka asütsü.

Election agitsü ita ishika lia federation yongtsü nung telemdang adokba den raratep tali kümogo aser iba ajanga mepetmesü aika adokba den election agitsü thia arudar.

BFI elections ya February 2 nü agitsü liasü, saka temzüng ozüng dak sendakba nung mangatetep aser inyakyim nung timtem adoka arudar.

Iba den bendenloksema Singh-i BFI secretary Hemanta Kalita aser treasurer Digvijay Singh na mapa nungi anentsüogo. Taoba Delhi High Court judge Sudhir Kumar Jain-i anir bushisüngdanga sülen tena ya senotsü ochi mashi ken o nung densema aliba nguteta liasü.

Kalita aser Digvijay napronglai okadak ken o benokogo.

Federation yongtsü nung mangatetep aliba ajanga state aikati taoba ita tetsür nationals nung shilem magi, kong Singh-i national championship ishika asayatsü aliba sangdonga laisü.

Interim committee ya BFI anogoshia inyakyim achaayangtsü aser iba den national championship balala ayongzuka asayatsü, tentettsüogo.

Committee-isa, international asayamungtem atema India team shimtsü aser India nung boxer tem tejangraba küzmüka toktsütsü atema SAI, IOA aser tanga national stakeholders tem den sendaktepa inyaksangshitsü.

Maneni committee dang parnoki jenjang agiba, inyakyim benokba aser tarutsü atema sentong yanglubatem indang anogo 30 tsünga World Boxing nem metetdaksütsü tetuyuba agütsüogo.

China nung Billie Jean King Cup final asayatsü

Rongchii/April 10, 2025 (Agencies): Shenzhen nung asayatsü aliba Billie Jean King Cup Finals ya November ita masü saka September ita asayatsü, ta asayamung ayongertemi Brehostibarnü metetdaksüogo.

Iba asayamung nung team 12 asayatsü liasü saka team ti dang kümtsüogo, koba tebur Davis Cup Final den liromdema kümtsüogo.

Finals atema qualifier Brehostibarnü tenzüko, aser team tem China nung host aser defending champions Italy den final nung asayatsü atema ticket

trok asoshi meranga toktepdar.

"Asayamung November ita asayatsü aliba September itai belener aluba ya Asia nung WTA asayamungtem tenzüka mapang ka nung lir aser iba ajanga asayartem kecha tetsükdaktsü mdoki asayatettsü," ta asayamung ayongertemi ashi.

Finals ya September 16 nü tenzüksü aser tatemangbuba asaya September 21 nü asayatsü lateta lir.

Italy-i taoba küm iba tetsürtem asayaba asayamung ya pongubenbuba koka liasü. Malaga nung final nung parnoki Slovakia koka liasü.

BILEMDANGANG

"Peisasa pei mazüoktetertemi tangar mazüoktettsü."